

十住毗婆沙論卷第九

規九

龍樹菩薩造

姚秦三藏法師鳩摩羅什譯

四十不共法品第二十一

菩薩如是以三十二相八十種好念佛生身  
規九

已今應念佛諸功德法所謂  
又應以四十不共法念佛 諸佛是法身  
非但肉身故

諸佛雖有無量諸法不與餘人共者有四十  
法若人念者則得歡喜何以故諸佛非是色  
身是法身故如經說汝不應但以色身觀佛  
當以法觀四十不共法者一者飛行自在二  
者變化無量三者聖如意無邊四聞聲自在  
五無量智力知他心六心得自在七常在安  
慧處八常不妄誤九得金剛三昧力十善知

不定事十一善知無色定事十二具足通達  
諸永滅事十三善知心不相應無色法十四  
大勢波羅蜜十五無礙波羅蜜十六一切問  
答及受記具足答波羅蜜十七具足三輪說  
法十八所說不空十九所說無謬失二十無  
能害者二十一諸賢聖中大將二十五四不  
守護二十九四無所畏三十九佛十種力四  
十無礙解脫是爲四十不共之法今當廣說  
飛行自在者諸佛飛行如意自在如意滿足  
速疾無礙所以者何佛若欲於虛空先舉一  
足次舉一足即能如意若欲舉足躡虛空去  
若欲住立不動而去即能得去若結跏趺安  
坐而去亦能得去若欲安卧而去亦復能去  
若欲於青瑠璃莖真珊瑚葉黃金爲鬚如意  
珠臺無量圍遶如日初出是寶蓮華徧於空

中踏上而去若欲如日月宮殿帝釋勝殿夜  
摩天兜率陀天化樂天他化自在天諸梵王  
等宮殿隨意化作如彼宮殿坐中而去即能  
成辦若更以餘種種因緣隨意能去是故說  
言隨諸所願皆能滿足是故諸佛能以一步  
現七  
過恒河沙等三千大千世界有人言佛能一  
念頃過若干國土有人言若知佛一步一念  
能如是去即可得量經中說諸佛力無量是  
故當知諸佛虛空飛行自在無量無邊何以  
故若大聲聞弟子神通自在以一念頃能過  
百億闍浮提瞿陀尼弗婆提鬱多羅越四大  
天王忉利天夜摩天兜率陀天化樂天他化  
自在天梵天一瞬中過若干念積此諸念以  
成一日七日一月一歲乃至百歲一日過五  
十三億二百九十六萬六千三千大千世界

如是聲聞人百歲所過佛一念能過復次假  
令恒河中沙一沙爲一河有大聲聞神通第  
一壽命如是諸恒河沙大劫於一念中過若  
干世界積如是念以爲日月歲數以自在力  
盡是諸大劫數所過國土佛能一念中過諸  
佛飛行自在如是速疾於一切鐵圍山十寶  
山四天處忉利天處夜摩兜率陀化樂他化  
自在梵世梵衆大梵少光無量光光音少淨  
無量淨徧淨廣果無想不廣不惱喜見妙見  
阿迦尼吒天如是諸處大風大水劫盡火等  
現九  
及諸天龍夜叉乾闥婆阿脩羅迦樓羅緊那  
羅摩睺羅伽諸天魔及梵沙門婆羅門及得  
諸神通者不能爲礙是故說飛行無礙又飛  
行自在如意所作出沒於地能過石壁諸山  
障礙等佛於此事勝諸聖人又佛能以常身

立至梵天聲聞人所不能及有如是等差別  
變化自在者變化事中有無量力餘聖變化  
有量有邊諸佛變化無量無邊餘聖於一念  
中變化一身佛以一念隨意變化有無量事  
如大神通經中說佛從齋中出蓮華上有化  
佛次第徧滿上至阿迦尼吒天諸佛變化所  
作衆事種種色種種形皆以一念又聲聞人  
能於千國土內變化諸佛能於無量無邊國  
土變化自在又能倍是諸佛得堅固變化三  
昧又諸佛變化能過恒沙世界皆從一身出  
復次佛能普於十方無量無邊世界現生受  
身墮地行七步出家學道破魔軍衆得道轉  
法輪如是等事皆以一念作之是諸化佛皆  
亦復能施作佛事如是等諸佛所變化事無  
量無邊又於聖如意中有無量力聖如意者

所謂從身放光光猶猛火又出諸雨變化壽  
命隨意長短於一念頃能至梵天能變諸物  
隨意自在能動大地光明能照無量世界而  
不斷絕聖如意者不與凡夫等故無有量故  
過諸量故諸凡夫等雖變化諸物少不足言  
聲聞人能裂千國土還使令合能令壽命若  
至一劫若減一劫還能令短短已復能令長  
於一念中能至千國土梵世界能於千國土  
隨意變化能動千國土能身出光明相續不  
絕照千國土設使身滅能留神力變化如本  
於千國土小辟支佛能於萬國土萬種變化  
第九  
中辟支佛能於百萬國土百萬種變化大辟  
支佛能於三千大千國土變化如上諸佛世  
尊能過諸恒河沙世界算數變化身出水火  
能抹恒河沙等世界令如微塵又能還合能

住壽命無量劫數還能令少少已還能令長能於無量時住變化隨意能以一念至無量無邊恒河沙等世界能以常身立至梵世又能變化無量無邊阿僧祇世界皆令作金或令作銀瑠璃珊瑚碑礫碼碭取要言之能令作無量寶物隨意所作又復能變恒河沙等世界大海水皆使爲乳酥油酪蜜隨意而成又能以一念變諸山皆是真金過諸算數不可稱計又能震動無量無邊世界一切欲界色界諸天宮殿又以一念能令若干金色光明徧照如是無量世界日月光明及欲色界諸天宮殿光明皆令不現雖滅度後能於如是諸世界中隨意久近流布神力常不斷絕聞聲自在者諸佛所聞聲中隨意自在若無量百千萬億妓樂同時俱作若無量百千萬

億衆生一時發言若遠若近隨意能聞假令恒河沙等三千大千世界所有衆生同時俱作若干百千萬種妓樂徧滿世界復有恒河沙等世界衆生同時以梵音徧滿一切世界諸佛若欲於中聞一音聲隨意得聞餘者不聞聲聞所應聞者若有大神力障者不能得聞諸佛所聞音聲雖有大神力障亦能得聞聲聞能聞千國土內音聲諸佛世尊所聞音聲過無量無邊世界最細音聲皆亦得聞大神力聲聞住梵世界發大音聲能滿千國土內諸佛世尊若住於此若住梵世若住餘處無量無邊世界最細音聲能令得聞欲令不聞即便不聞是故但有諸佛於音聲中得自在力知他心無量自在力者諸佛世尊於無

量無邊世界現在衆生悉知其心餘人但隨名相故知諸佛以名相義故知又餘人不能知無色界衆生諸心諸佛能知餘人雖有知他心智大力勢者障則不能知假使一切衆生成就心通皆如舍利弗目犍連辟支佛等以其神力障一人心不令他知而佛能壞彼神力得知其心復次佛以神力悉知衆生上中下心垢心淨心又知諸心各有所緣從是緣至是緣次第徧知一切諸緣又以實相知衆生心是故諸佛以無上力悉知他心第一謂伏心波羅蜜者善知諸禪定三昧解脫住入起時諸佛若入定若不入定欲繫心一緣中隨意久近如意能住從此緣中更住餘緣隨意能住若佛住常心欲令人不知則不能知假使一切衆生知他心智如大梵王如大

聲聞辟支佛成就智慧知他人心以此心智令一人得是人欲知佛常心若佛不聽則不能知如七方便經中說行者善知定相善知住定相善知起定相善知安隱定相善知定行處相善知定生相善知宜諸定法不宜諸定法是名諸佛第一調伏心波羅蜜諸佛常安慧者諸佛安慧常不動念常在心何以故先知而後行生隨意所緣中住無疑行故斷一切煩惱故出過動性故如佛告阿難佛於此夜得阿耨多羅三藐三菩提一切世間若天魔梵沙門婆羅門以盡苦道教化周畢入無餘涅槃於其中間佛於諸受知起知住知生知滅諸相諸觸諸覺諸念亦知起知住知生知滅惡魔七年晝夜不息常隨逐佛不得佛短不見佛念不在念安慧是名諸佛常住

安慧行中不忘失法者諸佛得不退法故通達五藏法故得無上法故諸佛常不忘失諸佛菩提樹下所得乃至入無餘涅槃若天魔梵沙門婆羅門及餘聖人無能令佛有所忘失如法印經中說道場所得是名實得更無勝法如衣毛暨經說舍利弗若人實語有能於法不忘失者應說我是何以故唯我一人無所忘失是名諸佛於法無忘失金剛三昧者諸佛世尊金剛三昧是不共法無能壞故於一切處無有障礙故得正徧知故壞一切法障礙故等貫穿故得諸功德利益力故諸禪定中最上故無能壞者是故名爲金剛三昧如金剛寶無物能破者是三昧亦如是無法可以壞者是故名金剛三昧問曰何故不可壞答曰一切處無有礙故如帝釋金剛無

有礙處是三昧亦如是問曰是三昧何故名一切處不礙答曰正通達一切法故諸佛住是三昧悉能通達過去現在未來過去三世不可說五藏所攝法是故名一切處不礙若諸佛住是三昧諸所有法若不通達名爲有礙而實不爾是故名無礙問曰何以故是三昧通達一切法答曰是三昧能開一切障礙法故所謂煩惱障礙定障礙智障礙能開故是名能通達一切法問曰是三昧何故能開一切障餘三昧不能答曰是三昧善等貫穿三法能壞諸煩惱令無餘故正徧通達一切法故善得不壞心解脫故是故此三昧能開一切障礙問曰是三昧何故等貫穿三法答曰住是三昧得力故能得一切諸功德餘三昧無如是力是故是三昧能等貫穿問曰

何故住是三昧得力故能得一切諸功德答曰是三昧於諸定中最爲第一是故住是三昧能得諸功德問曰何故是三昧於諸定中最爲第一答曰是三昧無量無邊善根所成故於諸定中最爲第一問曰是三昧何故無量無邊善根規九所成答曰是三昧唯一切智人有餘人所無是故名爲金剛三昧

四十不共法中難一切智人品第二十二

問曰汝說金剛三昧唯一切智人有餘人所無若是三昧但一切智人有餘人無者即無是三昧何以故無一切智人故何以故所知法無量無邊而智慧有量有邊以此有量有邊智慧不應知無量事如今現聞浮提水陸衆生過諸算數是衆生三品若男若女非男非女在胎孩童少壯衰老苦樂等法過去未

來現在諸心心數法及諸善惡業已集今集當集已受報今受報未受報萬物生滅及閻浮提中山河泉池草木叢林根莖枝葉花果所可知者無有邊際餘三天下亦如是四天下三千大千世界物亦如是三千大千世界物一切世界所可知物亦如是但世間數尚無量無邊難可得知何況諸閻浮提諸世間中衆生非衆生諸物分分以是因緣當知所可知物無量無邊故無一切智者若謂智慧有大力於所知法中無障礙故徧知一切可知法如虛空徧在一切法中是故應有一切智人者是事不然智大力可爾但智不能自知如指端不自觸是故無一切智若謂更有智能知是智是亦不然何以故有無窮過故知若自知若以他知二俱不然若是知有無

量力以不自知故不得言有無量力是故無  
有能知一切法智知不無知一切法智故則  
無一切智者何以故一切智者以智知一切  
法復次所知法無量無邊若和合百千萬億  
智人尚不能盡知何況一人是故無有一人  
能知一切法無有一切智若謂不以偏知一  
切山河衆生非衆生故名一切智人但以盡  
知一切經書故名一切智人者是亦不然何  
以故佛法中不說韋陀等經書義若佛是一  
切智者應用韋陀等經書而實不用是故佛  
非一切智人又四韋陀羅經有量有限今世  
尚無盡能知者況有盡知一切經書是故無  
有一切智人復次有經書能增長貪欲歌舞  
音樂等若一切智人知是事者即有貪欲是  
經書是貪欲因緣若有因必有果若一切智

人不知此事則不名一切智人復次有諸經  
書能助瞋恚喜誑於人所謂治世經書等若  
知是事則有瞋恚何以故有因必有果故若  
不知則不名一切智人是故知無一切智人  
復次佛不必盡知未來世事譬如我今難一  
切智人佛無經書預記是人如是姓如是家  
在某處以如是事難一切智人若謂佛盡知  
何以故不說是事若說經者經中應有不說  
是事是故知非一切智人復次佛若盡知未  
來世事應當預知調達出家已破僧若知者  
現六  
不應聽出家復次佛不知木機激石佛若預  
知者則不應於中經行復次佛不知旃遮婆  
羅門女以姪欲謗若佛先知應告諸比丘未  
來當有是事復次有梵志嫉佛故於餘處殺  
梵志女孫陀羅於祇洹塲中埋佛不知是事

若知是者應於諸梵志所救此女命至調達所推石下不說婆羅門女梵志女事以不知故當知佛不盡知未來世是故非一切智人復次佛入婆羅門聚落乞食空鉢而出不能預知魔時轉諸人心乃至不得一食佛若知者則不應入婆羅門聚落是故知佛不盡知未來事復次阿闍世王欲害佛故放守財醉象佛不知故入王舍城乞食若預知者則不應入是故佛不知未來事不知未來事故則非一切智人復次佛不知惡涅達多請佛因緣即受其請將諸比丘詣韋羅闍國是婆羅門忘先請故使佛食馬麥若佛預知婆羅門忘請佛及僧者則不應受請三月食馬麥是故知佛不知未來事不知未來事故則非一切智人復次佛受須涅又多羅爲弟子故則

不知未來事是人惡心堅牢難化不信佛語佛若知者云何受爲弟子受爲弟子故則不知未來事不知未來事故則非一切智人復次若佛是一切智人則應防護未有犯罪者當爲結戒以先不知結戒因緣有作罪已方乃結戒則不知未來事不知未來事故則非一切智人復次佛法但以出家受戒數歲處在上座恭敬禮拜不以耆年貴族諸家功德智慧多聞禪定果斷神通爲大若是智慧者應以耆年貴族諸家功德智慧多聞禪定果斷神通爲大供養恭敬若如是者名爲善制歲數者受戒年數如五歲道人禮六歲者貴族者世間有四品衆生婆羅門刹利毗舍首陀羅首陀羅應恭敬韋舍刹利婆羅門韋舍應恭敬刹利婆羅門刹利應恭敬婆羅門韋舍

諸家者工巧家商賈家居士家長者家大臣  
家王家等於諸家中其小家應恭敬大家如  
是於貧賤中出家者應恭敬富貴中出家者  
功德者毀戒人應恭敬禮拜持戒持戒者不  
應禮毀戒者不行十二頭陀者應禮行十二  
頭陀者不具足行頭陀者應禮具足行頭陀  
者智慧者無智慧人應禮敬有智慧者多聞  
者少聞人應禮多聞者不多誦者應禮敬多  
誦者果者須陀洹應禮敬斯陀含如是展轉  
應禮阿羅漢一切凡夫應禮得果者斷者少  
斷結使及未斷者應禮多斷者神通者若未  
具神通者應禮具足神通者佛若如是次第  
善說供養恭敬法者是爲上說而實不爾是  
故知非一切智人復次佛尚不能知現在事  
汝若謂我云何知佛不知現在事者今當說

規九

十二

之有衆生結使薄者無業障者離八難者堪  
行深法者能成正法者而佛不知佛成道已  
初欲說法生如是疑我所得法甚深玄遠微  
妙寂滅難知難解唯有智者可以內知世間  
衆生貪著世事此中除斷一切煩惱滅愛厭  
離第一難見若我說法衆生不解徒自疲苦  
生如是疑而實衆生有薄結使無業障者有  
離八難者堪行深法者能成正法者佛不能  
知如是衆生是故當知不知現在事又作是  
念昔我苦行五比丘供養執侍應先利益今  
在何處作是念已時有天告今在波羅柰鹿  
野苑中是故當知佛不知現在事不知現在  
事故則非一切智人復次佛得道已受請說  
法而作是念我今說法誰應先聞即復念言  
鬱頭藍弗此人利根易可開悟爾時此人先

以命終而佛方求時天告言昨夜命終佛又思惟迴心欲度阿羅羅天復白言是人亡來七日若佛是一切智者先應知此諸人命終而實不知不知過去事故則不名一切智人一切智人法應度可度者不可則置復次佛處處有疑語規九十三如巴連弗城是事當以三因緣壞若水若火若內人與外人謀若佛是一切智人者則不應有疑惑語是故知非一切智人復次佛問比丘汝等聚會爲說何事如是等問若一切智人者則不應問如是等事以問他故非一切智人復次佛自稱讚身毀訾他人如經中說佛告阿難唯我一人第一無比無與等者告諸比丘尼犍子等是弊惡人成就五邪法諸尼犍子等無信無慙無愧寡聞解怠少念薄智又說梵志尼犍諸外道弟

子等諸不可事若自稱讚毀訾他人世人尚愧何況一切智人有此事故非一切智人復次佛經始終相違如經中說諸比丘我新得道又言我得徃古諸佛所得道世間有智尚離終始相違何況出家一切智人而有相違以終始相違故當知非一切智人是故汝說金剛三昧唯一切智人得是事不然無一切智人故一切智三昧亦不成答曰汝莫說此佛實是一切智人何以故凡一切法有五法藏所謂過去法未來法現在法出三世法不可說法唯佛如實徧知是法如汝先難所知法無量無邊故無一切智人者我今當答若所知法無量無邊智亦無量無邊以無量無邊智知無量無邊法無咎若謂是知亦應以智知是則無窮者今當答汝應以智知如世

間人言我是智者我是無智者我是麤智者  
我是細智者以是因緣以智知知故則無無  
窮過如以現在知知過去智則盡知一切法  
無有遺餘復次如人數他通身爲十知亦如  
是自知亦他知規九則無有咎如燈自照亦照他  
如汝所說和合十四百千萬億智人尚不能盡知  
一切法何況一人知者是事不然何以故一  
智慧人能知衆事雖復衆多無有智慧不能  
有所知如百千盲人不任作導一人有眼任  
爲導師是故汝以一人爲難雖復多智於佛  
則無智是事不然汝謂佛不說韋大等外經  
故非一切智人者今當答韋大中無善寂滅  
法但有種種諸戲論事諸佛所說皆爲善寂  
滅故佛雖知韋大等經不能令人得善寂滅法  
是故不說問韋大中亦有善寂滅解脫說世

間先皆幽闇都無所有初有大人出現如日  
若有見者得度死難更有餘道又說人身小  
則神人大則神大身爲神宅常處其中若  
以智慧開解神縛則得解脫是故當知韋大  
中有寂滅解脫答曰無是事也何以故韋大  
中有四顛倒世間無常而別有常世間如說  
一作天祠墮落再亦墮落三作則不墮是爲  
無常中常顛倒世間苦而說有常樂處是爲  
苦中樂顛倒又說我神轉爲子願使壽百歲  
子是他身云何爲我是爲無我中我顛倒說  
規九身清淨第一無比金銀珍寶無及身者是名  
不淨中淨顛倒顛倒則無實無實云何有寂  
滅是故韋大中無善寂滅法問曰韋大中說  
能知韋大者清淨安隱云何言無善寂滅法  
答曰知韋大者雖說安隱非畢竟解脫於異

身中生解脫想是說因長壽天說爲解脫是故韋大中實無解脫復次韋大中略說有三義一者呪願二者稱讚三者法則呪願名爲令我得妻子牛馬金銀珍寶稱讚名爲汝火神頭黑頭赤體黃常在衆生五大中法則名爲是事應作是不應作如從昴星初受火法而實呪願稱讚法則無有寂滅解脫何以故貪著世樂然蘇呪願無真智慧不斷煩惱何有解脫問曰韋大法自古有之第一可信汝言無善寂滅故不可信者是事不然何以故佛法近乃出世韋大自古久遠常在世間是故古法可信近法不可信汝言韋大中無善寂滅法是事不然答曰時不可信無明邪見自古亦然有無明先出正智後出邪見先出正見後出不可以無明邪見先出故可信正

智正見後出不可信如先有汙泥後有蓮華先有疾後有藥如是不可以在先出者爲貴是故韋大先出佛法後出謂不可信者是事不然復次過去定光等諸佛皆先出世其法則古出韋大是後出若汝以先父爲貴者此諸佛及法則應是貴問曰韋大不能作善寂滅是故佛法中不說若佛知不能作寂滅何用知爲若不知則非一切智人二俱有過答曰汝語非也佛先知韋大不能善寂滅故不說亦不修行問曰若佛知韋大無有利益故而說不修習者何用知爲答曰大智之人應悉分別是正道是邪道欲令無量人衆度險惡道故行於正道譬如導師善分別邪道正道佛亦如是既自得出生死險道亦復欲令衆生出故善知八直聖道亦知韋大等邪險

惡道爲離邪惡道故行於正道但知而不說猶如農夫爲穀種植至秋收穫亦得草麁佛亦如是爲無上道故勤行精進得菩提亦知韋大等諸邪道是故無咎如汝先說無人能有具知四韋大者此難不然世間人各有念力有人一日能誦五偈有誦百偈有誦二百偈若人一日不誦十偈則謂無能誦百偈出百偈者此非實語汝等不能盡知故便言都無智者若人見一人不能度河便言無能度者是人不名正說何以故自有餘大力者能度此亦如是設使餘人不能盡知一切智者知之何咎復次脾娑仙人皆讀韋大亦應成一切智若有盡讀韋大何以言無一切智若汝言有經書能生貪欲瞋恚者我今當答若人欲長壽應離死因緣佛亦如是欲斷一切

衆生貪欲瞋恚應知貪欲因緣復次如汝所說能知生貪欲瞋恚經書則有貪欲瞋恚者無有是也佛雖知是不用不行故無過咎如人知死因緣則不死若行死因緣則死是事亦爾若汝說不知未來事故不名一切智者我今當答此則非難我等亦知有難一切智者如經中說佛告諸比丘凡夫無能有三相不應思而思不應說而說不應作而作是故皆已總說汝等未來世凡夫皆在其中無利益故何用分別說其名字等若謂佛知有難不預答者亦不須此今現四衆中亦有善斷疑難者今亦有能破諸難問者何用先答如汝今日現見比丘之中能破婆羅門者是故不須先答又先時亦有答散在衆經人不能具知佛法故不知處所若言受調達出家事

我今當答謂受調達出家則非一切智人者是謂不然調達出家非佛所度問曰若餘人度者佛何以聽答曰善惡各有時不必出家便惡調達出家之後有持戒諸功德是故出家無過復次調達於十二年清淨持戒誦六萬法藏此果報者當來不空必有利益汝說調達機闊激石者我今當說諸佛成就無殺法故一切世間無能奪命者問曰若成就不殺法者何故逆石而來答曰佛於先世種壞身業定報應受示衆生業報不可捨故現受是故自來汝言旃遮女佛不先說者我今當答以旃遮女故譏佛者不能壞一切智人因緣若佛先說旃遮女當來謗我者旃遮女則不來復次佛先世謗人罪業因緣今必應受汝說佛何以不遮孫陀利入祇洹事我今當

答此事不能壞一切智人因緣佛無有力令一切衆生盡作樂人又諸佛離一切諍訟不自高身不著持戒是故不遮復次佛先世業熟故必應受七日謗又衆生見佛聞謗不憂宣明不喜故發無上道心作是願言我等亦當得如是清淨心是故無咎汝先說佛入婆羅門聚落空鉢而出非一切智人者今當答佛不以飯食先觀人心入聚落已魔轉其意問曰是事佛應先知我入聚落魔當轉人心答曰佛亦先知此事爲大利益衆生諸佛非但以受人食故以爲利益度脫衆生有以清淨心迎逆敬禮和顏瞻視此皆大利何必飲食以種種門利益衆生非空入聚落汝說佛逆趣醉象者今當答佛雖知此事以因緣故往以此醉象必應得度又能障其害佛罪業

復次此象身如黑山衆人見此低頭禮佛皆起恭敬以是因緣故往趣復次佛趣此象無有過失若有惡事可作此難汝難至隨蘭若者爲受先世業果報故汝說畜須涅又多羅爲弟子者今當說佛身口意命不須守護無所畏故聽爲弟子復次是人常近佛故得見種種大神力見諸天龍夜叉乾闥婆阿脩羅等諸王來供養佛請問種種甚深要法心得清淨心清淨故得利益因緣是故雖惡聽爲弟子問曰此人於佛多生惡心是故不應聽爲弟子答曰若不聽爲弟子亦有惡心是故聽爲弟子無咎汝說先未作罪時何以不制戒今當答佛先結戒說八聖道正見正思惟正語正業正命正精進正念正定說是至涅槃道故已說一切諸戒復次佛說三學善學

戒善學心善學慧當知已說一切諸戒復次佛告諸比丘一切惡決定不應作是不名先結戒耶復次佛說十善道離殺盜婬兩舌惡罵妄言綺語貪嫉瞋恚邪見不名先結戒耶佛先十二年中說一偈爲布薩法所謂一切惡莫作一切善當行自淨其志意是則諸佛教是故當知先已結戒復次佛說諸小惡因緣皆應當離如說

離身諸惡行 亦離口諸惡 離意諸惡行  
餘惡悉遠離

如是說者當知先以結戒復次佛先已說諸守護法如說

護身爲善哉 能護口亦善 護意爲善哉  
護一切亦善 比丘護一切 得遠離諸惡  
如是說者當知先以結戒復次佛先說善相

如說

手足勿妄犯 節言慎所行 當樂守定意  
是名真比丘

如是說者當知先以結戒復次說沙門法故  
當知先以結戒沙門有四法一於瞋不報二  
於罵默然三杖捶能受四害者忍之復次佛  
說四念處觀身觀受觀心觀法是涅槃道住  
處故當知先結戒若微小惡尚不聽何況身  
口惡業如是等因緣當知先已結戒如王者  
立制不應作惡後有犯者隨事輕重作如是  
罪如是治之佛亦如是先總說戒後有犯者  
說其罪相如有作惡者教令懺悔作如是罪  
應如是懺不見擯滅擯不共住等成如是事  
故後乃結戒汝說者年貴族家等應爲上座  
今當答道法中耆年貴族家等於道無益何

以故生佛法中名爲貴族好家中生從受大  
戒數其年數名爲耆年沒謂耆年應供養者  
先出家受戒非是大耶從受戒以後無有諸  
姓等差別諸比丘受大戒名爲生在佛家是  
則失先大小家名皆爲一家汝說持戒者出  
家在先持戒日久長夜護持年歲多故應爲  
上座如結戒中說汝說持戒之人不應禮破  
戒者今當答破戒人尚不應共住何況禮拜  
供養以其自言是比丘故隨其大小而爲作  
禮如禮泥木天像以念真天故佛勅年少應  
禮上座順佛教故則便得福汝說以頭陀故  
應敬禮者今當答若頭陀人人有五種故難  
得分別一者愚癡無所知故貪受難法二者  
鈍根希望得利三者惡意欺詐於人四者狂  
亂五者作念頭陀法者諸佛賢聖所共稱讚

以其隨順涅槃道故是五種人行頭陀法真  
偽難別多聞者多聞之人亦如頭陀難可分  
別何以故或以樂道故多聞或以利養故多  
聞如是等亦難分別又佛法貴如說行不貴  
多讀多誦又如佛說行一法句能自利益名  
爲多聞智慧亦如是若不能如所說行何用  
智慧爲是故不以智慧故說爲上座譬如世  
間現事弟雖多聞多智而兄不爲作禮是故  
不以智慧故先受供養禮拜如是雖多聞智  
慧應禮先受戒者若先受供養多聞智慧者則  
爲聞餘沙門果斷結得神通最難知是人  
得果是不得果是多聞斷結是少聞斷結是  
得神通是不得神通不可以此爲上座若同  
得道果斷結神通誰爲上座是故隨佛教行  
最爲第一汝說佛於說法生疑今當答佛於

深法尚不有疑何況應說不應說中而有疑  
乎佛不言我都不說法但云心樂閑靜不務  
多事而後於說法中無咎復次諸外道言佛  
爲大聖寂默無戲論何用畜衆而教化爲設  
便教化亦不可盡似如分別何用說法畜養  
弟子是貪著相是故佛自思惟我法甚深智  
慧方便無量無邊而可度者少是故自言不  
如默然又防外道所譏訶故令梵天王求請  
說法即時梵天王等白佛言衆生可愍中有  
利根結使薄者易可化度是故受諸梵王等  
規九請如人得大寶藏應示餘人如是諸聖自得  
法利亦應利人如汝所說佛不知阿蘭伽蘭  
等先已命終欲爲說法者今當答佛不念其  
死與不死但念此人結使微薄堪任化度隨  
所念處則有智生是故佛先自說而後天告

理故宜然又佛先出家就此二人曾經宿止諸天人民儻能疑佛受其妙法餘處得道佛欲斷彼疑故即時唱言彼人長衰如此妙法如何不聞推如是義五比丘事亦復可知但念其可度因緣不念其住止所在後念住處即便得知是故不應破一切智人汝言疑說巴連弗城壞者今當答是城破因緣不定不定因緣而定說者是則爲過又我先說四十不共法中諸佛善知不定答者則不受此難汝說佛問諸比丘汝等聚會爲何所說今當答佛將欲說法門故作如是問或欲結戒故令其自說如是種種說法故問而無咎世間亦有知而復問如見人食問言食耶如天寒時間言寒耶佛亦如是知而復問隨俗無咎汝言自讚毀他非一切智人者今當答佛不是故言我新得道餘處復說我得故道是道

貪身不貪供養不恚他人不增上慢所以自說我於世間最第一者有信衆生諸根猛利捨惡知識以我爲師是人長夜當得安隱是故佛自讚身復次有人求第一樂道而有懈怠不能精進是故佛言無上利中不應懈怠我於世間第一導師善說正法宜勤精進可得道果如是等因緣自讚其身非爲自貴輕賤他人訶惡人者欲令除滅惡法非爲憎恚衆生有人求如法利其心清淨質直而與惡知識和合欲令遠離此故而訶罵之未得佛時尚以髓腦施人何況成佛而當訶罵汝說佛法初後相違今當答佛法中無有始終相違事汝等不知佛法義故以爲相違是涅槃道者從迦葉佛滅已來無復人說亦無人得是故言我新得道餘處復說我得故道是道

錠光等諸佛所得所謂八聖道能至涅槃一  
道一因緣故名爲故道是故當知佛成一切  
智問曰所言一切智者云何名爲一切智爲  
知一切故名爲一切智耶答曰一切智者知  
可知可知者五法藏過去未來現在出三世  
不可說所用知此五藏者名爲知是故知及  
所知名爲一切問曰知可知名爲一切者是  
事不然何以故是法但是一可知知亦是可  
知故如世間言是人知利是人知鈍答曰若  
一切是一者則寒熱相違皆應是一明闇苦  
樂諸相違事亦應是一但是事不然故不得  
得言一切皆是一問曰汝所執亦同此過若  
可知是一者苦樂等亦應是一而實不一答  
曰我不言一切可知是一汝所執一切皆是  
一是故不與汝同過復次汝說同有過故汝

自執中有過若人自受所執中過即墮負處  
汝知所執有過不應復說他過是故汝說同  
有過者是事不然復次若謂知可知二法爲  
一者應用可知法知瓶衣等物而實用知知  
一切物若謂瓶衣等於知無異者今瓶衣等  
不能知物即應有異而實用知知一切物如  
是處處有過故不得言一切智是一復次知  
所知是二名爲一切知是一切法故名如來  
名一切智者是一切智人因金剛三昧是故  
金剛三昧成汝先言金剛三昧不成一切智  
不成者是事不然

十住毗婆沙論卷第九

音釋

獲 胡 郭 切 羊 即  
刈 禾 也 戴 北 諱  
必 刀 切 儂 然 之  
也 也 他 畏 切 或  
丘 儂 散 走 也 捶  
也 也 也 也 主 樂  
也 也 也 也 也 擾

見

玉